

四庫全書

子部

欽定四庫全書

子部

格致鏡原卷十三至

六

詳校官中書臣羅錦森

侍讀臣孫球覆勘

總校官中書臣朱鈐

校對官原任典簿臣郭祚熾

謄錄監生臣金國禮

欽定四庫全書

格致鏡原卷十三

大學士陳元龍撰

冠服類一

冠

總論 說文冠首服弁冕之總名 董巴漢輿服志上古衣毛而冒皮後代聖人易之見鳥獸有冠角頗胡之制遂作冠冕纓綬以為首飾 羣書考索黃帝以前則以羽皮為之冠黃帝以後則以布帛為之飾凡冠冕纓

綏之作皆有所象也古者冠其飾有緣其貫有笄其束有武其繫有纓其垂有綏白虎通冠帩也所以帩持髮也人示成禮有修飾文章故制冠以飾首別成人也逸雅冠貫也所以貫韜髮也纓頸也自上而繫於頸也禮書二組屬於笄順頤而下結之謂之纓纓之垂者謂之綏說文紘冠卷也纓冠系也禮記玄冠朱組纓天子之冠也緇布冠續綏諸侯之冠也玄冠丹組纓諸侯之齊冠也玄冠綦組纓士之齊冠也緇冠玄武

子姓之冠也垂綬五寸游惰之士也玄冠縞武不齒之服也莊子劍士皆垂冠曼胡之纓注垂冠不高其冠如今包巾也曼胡粗魯也尉繚子天子玄冠玄纓諸侯素冠素纓大夫以下練冠練纓漢書江充傳冠飛翾之纓注服虔曰以鳥羽作纓也臣瓚曰飛翾纓謂如蟬翼也

歷代冠制 三禮圖大古冠布齊則緇之後以為冠冠之始也詩小雅彼都人士臺笠緇撮注緇撮緇布冠

五侯鯖黃收堯冠也 三禮圖夏之冠曰毋追以漆布為殼以緇縫其上前廣四寸高三寸商之冠曰章甫其制與周之委貌夏之母追俱用緇布為之 名物考禮記曰孔子冠章甫之冠莊子曰孔子冠枝木之冠蓋枝木之冠即章甫也 三禮圖周之冠曰委貌一名玄冠 白虎通委貌者何朝廷理政事行道德之冠也周統十一月為正萬物始萌冠飾最小故為委貌言委曲有貌也 晉書委貌冠行鄉射禮則公卿冠之以皐絹

為之形如覆杯 庶物異名疏 儀禮委貌周道也註委  
猶安也言所以安正容貌也後漢輿服志大射辟雍公  
侯大夫冠委貌長七寸高四寸制如覆杯前高廣後卑  
銳按禮記制度示掌圖則與此異前方大後如刀下有  
繫者 事物紺珠緇布冠後用烏紗漆為之五積向左  
象五常 蔡邕獨斷通天冠天子所冠 徐爰釋問通  
天冠金博山蟬謂之金顏 漢輿服志通天冠高九寸  
正豎頂少邪却乃直下為鐵卷梁前有山展簫為述乘

與所常服 晉書通天冠本秦制前後有展筓冠前加  
金博山述郊祀天地明堂宗廟元會臨軒介憤通天冠  
平冕 唐書通天冠冬至朝賀祭還燕羣臣養老之服  
唐書太宗嘗以幘頭起於後周便武事者也方天下  
偃武採古制為翼善冠自服之元日冬至朔望視朝服  
翼善冠 事物紺珠冲天冠唐制交天冠以展脚相交  
於上國朝改展脚不交向前朝其冠纓象善字名翊善  
後改展脚向上名冲天 淮南子楚莊王冠通梁組纓



注通梁遠游冠 晉書遠游冠秦冠也似通天而前無  
山述有展筩橫於冠前皇太子及王者後帝之兄弟帝  
之子封郡王者服之太子則以翠羽為綏綴以白珠其  
餘但青絲而已 獨斷諸侯王冠遠游冠 梁書帝臨  
軒冠太子於太極殿舊制太子著遠游冠金貂蟬翠綏  
纓至是詔加金博山 獨斷公侯冠進賢冠 三禮圖  
周之委貌今之進賢冠乃其遺像也 漢百官表注博  
士祭酒一人掌國子學皇朝服進賢兩梁冠佩水蒼玉

唐車服志進賢冠者文武朝叅三老五更之服也

晉書進賢冠古緇布遺象儒者之服前高七寸後高三寸長八寸有五梁三梁一梁人主玄服始加緇布則冠五梁進賢三公及封郡公縣公郡侯縣侯鄉亭侯則冠三梁鄉大夫八座尚書闕內侯二千石及千石以上則冠兩梁中書郎秘書丞郎著作郎太子洗馬舍人六百石以下至令史門郎中吏並冠一梁 車服志唐太宗製進德冠以賜貴臣玉璫象如弁以金飾梁花趺三品

以上加金絡五品以上附山雲 輿服志却非冠製似  
長冠下促宮殿門吏僕射冠之負赤幡青翅燕尾 三  
禮圖却非冠高三寸 獨斷却敵冠前高四寸通長四  
寸後高三寸監門衛士服之 晉書方山冠其制似進  
賢獨斷方山冠以五采縠為之漢祀宗廟大享八佾  
樂五行舞人服之衣冠各從其行之色如其方色而舞  
焉 事物紺珠方山冠漢制前高七寸後高三寸長八  
寸北堂書鈔漢制洗馬冠高山冠 獨斷高山冠蓋

齊王冠也秦滅齊以其君冠賜謁者 晉書高山冠一名側注高九寸鐵為卷梁制似通天頂直豎不斜却無山述展簫中外官謁者僕射所服魏明以其制似通天遠游故改令卑下 顏師古漢書注謂之側注者言形側立而下注也 獨斷巧士冠高五寸要後相通似高山冠而小 輿服志巧士冠高七寸不常服惟郊天黃門從官四人服之在鹵薄中次乘輿車前以備宦者四星獨斷術士冠前圓吳制邈迤四重趙武靈王好服

之與服志獬豸神羊也楚王獲之以為冠及秦滅楚  
以其君冠賜執法近臣御史服之漢官儀獬豸獸性  
能觸不直故執憲者以其角形為冠獨斷法冠楚冠  
也一曰柱後惠文冠高五寸以纚裹鐵柱卷今御史廷  
尉監平服之謂之獬豸冠獬豸一角今冠兩角以獬豸  
為名非也大傳胡公說曰左氏傳有南冠而縶者國語  
曰南冠以如夏姬是知南冠蓋楚之冠孔六帖宋太  
祖製百官服飾於御史執法官冠服加獬豸至元日或

冬至朝會侍御史則乘馬具服戴黑豸冠升殿事物  
紺珠國朝獬豸冠內外臺官梁冠上加金裝獬豸與古  
制不同 羣書考索言柱後惠文則法冠也但言惠文  
則侍中冠也惠文之名蓋起於趙自趙武靈王改胡服  
以金鐙飾前前挿貂尾以為貴職後代效之故名惠文  
至漢因之亦名武弁或曰大冠 獨斷武冠或曰繁冠  
今謂之大冠武官服之侍中中常侍加黃金附蟬為文  
貂尾飾之趙武靈王始施貂蟬之飾秦滅趙以其君冠

賜侍中 漢官儀貂蟬冠侍中中常侍服黃金璫附蟬  
為文貂尾為飾侍中插左常侍插右 晉書武冠一名  
建冠一名籠冠即古惠文冠或曰趙惠文王所造因名  
亦云惠螭也其冠文輕細如蟬翼故名或云齊人見千  
歲涸澤之神名曰慶忌冠大冠乘巾車好疾馳因象其  
冠而服焉 宛委餘編冠加金璫貂蟬者金取剛強百  
煉不耗蟬居高飲清口在腋下貂內競悍而外柔縉蓋  
真貂也故曰貂不足狗尾續今則取絲繩屈曲而上有

纓耳 事物紺珠國朝公冠八梁加籠巾貂蟬立筆五折四柱香草五段前後用玉蟬侯冠七梁加籠巾貂蟬立筆四折四柱香草四段前後用金蟬伯冠七梁加籠巾貂蟬立筆二折四柱香草二段前後玳瑁為蟬俱左插雉尾 史記漢惠帝時侍中皆冠駿蟬冠 通典駿蟬冠即武弁也 漢書注以駿蟬毛羽飾冠 獨斷建華冠以鐵為柱卷貫大珠九枚今以銅為珠形制似縷簾記曰知天文者服之左傳曰鄭子臧好聚鷗冠前圖



徒一作以為此則是也天地五郊明堂月令舞者服之

左傳注鵠冠聚鵠羽為冠 衾言禮記知天者冠述注  
通天冠誤矣述建華冠也注禮記者以通天冠前有山  
述故誤述為通天冠耳逸周書知天文者冠鵠述即鵠  
也天將雨鵠先知之故知天者以為冠禮圖以鵠冠為  
術士冠此又以述與術音相近而誤漢志自有術士冠  
趙武靈好服之漢不施用非鵠冠也 高士傳鵠冠子  
隱於幽山以鵠為冠 漢官儀虎賁冠插兩鵠尾 禽

經鵠冠武士服之象其勇也 淮南子楚文王好雉冠  
楚國倣之注雉冠今力士冠 戰國策鯁冠林縫大吳  
之國也 宋書何尚之致仕在家常著鹿皮冠 南史  
陳伯之年十三四好著獼皮冠 筆記葛延之常親製  
龜冠獻東坡 周書成王將加玄服周公使人來零陵  
取文竹為冠 事物原始原憲戴樺皮冠 傳燈錄天  
台寒山子以樺皮為冠 漢書高祖為亭長以竹皮為  
冠及貴常冠之所謂劉氏冠也後令爵非公乘以上無

得冠劉氏冠註竹皮冠以竹始生皮為冠今鵲尾冠是也  
晉書長冠一名齊冠高七寸廣三寸漆纚為之制  
如版以竹為裏漢高祖微時以竹皮為此冠其世因為  
劉氏冠後除竹用漆纚司馬彪曰長冠蓋楚制人間或  
謂之鵲尾冠非也救日蝕則服長冠南史齊高帝賜  
明僧紹筍箴冠潛確類書束髮冠古制也三王畫像  
多作此冠名曰束髮者亦以僅能撮一髻耳莊子宋  
鉞尹文為華山之冠以自表戰國策宋康王為無頭

之冠以示勇 獨斷樊噲冠漢將軍樊噲造次所冠以  
入項籍營廣七寸前出尺四寸司馬殿門大護衛士服  
之 晉書樊噲在鴻門時持鐵楯聞急裂裳苞楯戴以  
為冠排入羽營後人壯其意乃制冠象焉 山堂肆考  
切雲高冠名楚辭冠切雲之崔魏 漢記馬援與公孫  
述有舊援從冀入蜀述見之令冠交讓冠立舊交之位  
漢書江充初召見犬臺宮冠蟬纚步搖冠 前燕錄  
慕容廆曾祖父莫護跋見燕代少年多冠步搖冠好之

乃歛髮襲冠諸部因呼之為步搖其後音訛而為慕容  
遂以慕容為氏 漢書杜欽字子夏家富而目偏盲茂  
陵杜業亦字子夏時人號欽為盲杜子夏以相別欽惡  
以疾詆迺為小冠高廣裁二寸由是京師更謂欽為小  
冠杜子夏 漢舊儀新改令長皆試小冠滿歲為真以  
次遷別製大冠 續漢書梁冀改輿服制卑幘狹冠  
清異錄士人暑天不欲露髻則頂矮冠清泰間都下星  
貨鋪賣一冠子銀為之五朶平雲作三層安置計止是

梁朝物匠者遂依倣造小樣求售 禮記黃衣黃冠而

祭息田夫也野夫黃冠黃冠草服也 家語大夫請罪

用白冠羗纓

婦人冠 事物原始黃帝制為冠冕而婦人首飾無文

至周時不過副笄而已漢時宮掖承恩者始賜以或碧

或緋芙蓉冠子 崔豹古今注冠子秦始皇之制也令

三妃九嬪當暑戴芙蓉冠子以碧羅為之插五色通草

蘇朶子宮人戴黃羅髻蟬冠子五花朶子隋帝令宮人

戴通天百葉冠子插琴瑟鈿朵皆垂珠翠 明皇雜記

持盈公主玉葉冠希世之寶 蘇鶚杜陽編寶歷二年

浙東貢舞女戴輕金冠以金絲結之為鸞鶴狀仍飾以

五采細珠玲瓏相續可高一尺秤之無二三分 孔六

帖後蜀王衍後宮皆戴金蓮花冠酒酣免冠其髻鬢然

更施朱粉號醉粧國中人均效之 山堂肆考宋魏國

大長公主下嫁李遵勗章獻太后嘗賜金龍小冠 宋

燕翼貽謀錄舊制婦人冠以漆紗為之而加以飾金銀

珠翠采色裝花初無定制仁宗時宮中以白角改造冠并梳冠之長至三尺有等肩者梳至一尺議者以為妖仁宗亦惡其侈皇祐元年十月詔禁中外不得以角為冠梳冠廣不得過一尺長不得過四寸梳長不得過四寸終仁宗之世無敢犯者其後侈靡之風盛行冠不特白角又易以魚枕梳不特白角又易以象牙玳瑁矣

李廌談記孫敬之曰呂相夫人乃中表親也為某言禁中禮數甚詳曰御宴惟五人上居中寶慈在東長樂在



西皆南向太妃暨中宮皆西向寶慈暨長樂皆白角團冠前後惟白玉龍簪而已衣黃背子衣無華采太妃暨中宮皆縷金雲月冠前後亦白玉龍簪而飾以北珠珠甚大衣紅背子皆用珠為飾江休復隣幾雜志錢明逸知開封府時都下婦人白角冠闊四尺梳一尺餘上疏禁之重其罰告者有賞草木子元朝后妃及大臣正室皆戴姑姑其次即戴皮帽姑姑高二尺許用紅色羅蓋唐金步搖冠之遺制也席上腐談嚮見官妓舞

拓枝戴一紅物體長而頭尖儼如鞋形想即今之罍姑也胡侍真珠船顧姑姑用鐵絲結成如竹夫人長三尺許用紅青錦繡或珠玉飾之南村輟耕錄翰林學士承旨阿木喀巴拉帶罍罍娘子十五人聶碧窓詩云雙柳重鬟別樣梳醉來馬上倩人扶江南有眼何曾見爭捲珠簾看固姑顧姑姑罍罍固姑實一物也事物紺珠國朝皇后禮冠圓匡冒以翡翠上飾九龍四鳳十二樹小花如之兩博鬢十二鈿東宮王妃禮冠九翬

金四鳳花釵九樹小花如之寶鈿九翠雲博鬢描金阜  
羅額珠着心珠牌環金牌環脚一隻其燕居冠犀冠刻  
以花鳳冠上火珠博鬢結子金鳳二金寶鈿二十七金  
簪二世子妃冠珠翠七翟冠命婦一品冠金事件珠翠  
五箇珠牡丹開頭二珠半開三翠雲二十四玉牡丹葉  
十八翠口圈一副上金寶鈿花八箇金翟二銜珠結二  
二品至四品冠金事件珠翟四珠牡丹開頭二珠半開  
頭四翠雲二十四片翠牡丹葉十八翠口圈一副上金

寶鈿花八箇金翟二銜珠結二五品六品冠金銀事件  
珠翟三珠牡丹開頭二珠半開五翠雲二十四翠牡丹  
葉十八翠口圈一副上抹金銀寶鈿花八箇抹金銀翟  
二銜珠結子二七品至九品冠抹金銀事件珠翟二珠  
月桂開頭二珠半開六翠雲二十四翠月桂葉十八翠  
口圈一副上抹金銀寶鈿花八箇抹金銀翟二銜珠結  
二

外國冠

雞跖集南齊永明中高麗使至冠拒風冠

北史高句麗國人頭著折風形如弁士人加插二鳥羽  
貴者其冠曰蘇骨多用紫羅為之飾以金銀 孔六帖

高麗國王以白羅製冠大臣青羅冠 北史林邑國王

戴金花冠形如章甫 南史新羅國呼其冠曰遺子禮

隋書于闐國王錦帽金鼠冠妻戴金花其王髮不令

人見俗云若見王髮年必儉 孔六帖南蠻東謝蠻貞

觀三年其酋元深入朝冠烏熊皮 葉隆遼志番官戴

氊冠上以金華為飾或以珠玉翠毛為飾蓋漢魏時遼

人步搖冠之遺像也額後重金花織成夾帶中貯髮一  
總服紫窄冠帶以黃紅色條裹革為之用金玉水晶碧  
石綴飾又有冠如紗帽無簷不撒雙馬額前綴金花上  
結紫帶末綴朱或紫阜幅巾 李材解醒語至元間馬  
八兒國入貢寶花冠十頂其冠以金作花七寶裝纓絡  
為飾

仙道冠 五嶽圖青城丈人戴蓋天之冠 八景經東  
元君道君冠七色曜天玉冠 上清經玉真九天建金

華七曜之冠 太洞玄訣皇初紫元天中真人巾綠霞  
之冠 上清經玉真九天丈人戴飛精百變之冠 漢  
武內傳上元夫人戴九星靈芝夜光之冠西王母戴太  
真晨纓之冠 變化經太紫真君建紫晨巾太帝建七  
氣朱冠帝君建紫冠 神仙服食經漢武帝閒居未央  
殿有人乘白雲車駕白鹿戴芙蓉冠曰我中山衛叔卿  
也 清異錄道士所頂者素籥冠 山堂肆考二儀冠  
道士服也六朝詩法冠二儀立 事物紺珠兩儀冠後

垂飛葉二片魚尾冠七星冠三山冠掩月冠披雲冠卷雲冠玉葉冠降魔冠椰子冠黃冠華陽冠交泰冠皆道冠也

冕

總論 三禮圖冕者俛也後高前下有俯伏之形 釋名祭服曰冕冕猶俛也亦言文也玄上纁下前後垂珠有文飾也 世本胡曹作冕注胡曹黃帝臣也蓋冕服起於黃帝加飾起自唐虞 三禮圖制冕皆前圓後方



朱裏元表 通典禮篇黃帝作冕垂旒目不邪視黻纁  
示不聽讒言也 事物紺珠黻纁以黃綿為九用紐懸  
冕垂於兩耳 古今注牛亨問冕旒稱繁露者何也答  
曰綴而下垂如露之多故曰繁露

歷代冕制 禮記有虞氏皇而祭夏后氏收而祭商人  
皐而祭周人冕而祭 周禮弁師掌王之五冕皆玄冕  
朱裏延紐五采纁十有二就皆五采玉十有二玉笄朱  
紘諸侯之纁旒九就璫玉三采其餘如王之事纁旒皆

就玉璵玉筭注五冕衮冕至玄冕是也其為制玄在上  
朱在下延版之覆上者組綴於冕傍者以五采為縹繩  
垂於前後以五色玉貫於縹繩而垂之就成也玉筭以  
玉為筭而橫貫朱紘以組為紘而下垂諸侯當作諸公  
縹旂九就如其命數也璵玉三采朱白蒼也其餘制度  
皆與玉同縹旂皆就玉璵玉筭總言侯伯子男之冕也  
侯伯七命則七就子男三命則三就以玉為璵所以塞  
耳也周禮司服掌王之吉凶衣服王之吉服享先王

則袞冕享先公饗射則鷩冕享四望山川則毳冕享社  
稷五祀則希冕祭羣小祀則玄冕 唐志天子之服大  
裘冕祀天地袞冕踐祚饗廟鷩冕有事遠王毳冕祭海  
嶽絺冕祭社稷饗先農玄冕蜡祭百神朝日夕月 禮  
記天子玉藻十有二旒前後邃延龍卷以祭注祭先王  
之法服也雜采曰藻天子以五采藻為旒旒十有二前  
後邃延者言皆出冕前後而垂也天子齊肩延冕上覆  
元表纁裏 筠軒釋略記曰天子玉藻玉謂冕前後垂

旒之玉也藻謂雜采絲繩之貫玉者也蓋以藻穿玉以玉飾藻故總謂之玉藻 白虎通麻冕者何用周廟之冠也所以用麻為之者女功之始示不忘本不以皮反太古未有禮文之服也 三禮圖叔孫通制禮多依周法古今之冕俱廣八寸長尺六寸 獨斷漢孝明帝永平二年詔有司採尚書皋陶篇及周官禮記定而制焉皆廣七寸長尺二寸前圓後方朱綠裏而玄上前垂四寸後垂三寸繫白玉珠於其端是為十二旒組纓如其

綬之色三公及諸侯之祠者朱綠九旒青五珠卿大夫  
七旒黑五珠皆有前無後組纓各視其綬之色旁垂黹  
纁當耳郊天地祠宗廟祀明堂則冠之鄙人不識謂之  
平天冠 晉書天子郊祀天地明堂宗廟元會臨軒介  
幘通天冠平冕冕阜表朱綠裏加於通天冠上前圓後  
方垂白玉珠十有二旒以朱組為纓無綏佩白玉垂珠  
黃大旒綬黃赤纁紺四采 晉書晉過江服章多闕而  
冕飾以翡翠珊瑚雜珠顧和奏冕旒用白玉珠今美玉

難得可用白璇珠 通典北齊採陳之制旒玉用五采  
以組為纓色如其綬其四時祭祀封禪皆服袞冕 通  
典後周設司服之官掌皇帝十二冕祀昊天則蒼冕五  
帝各隨其方色朝日用青冕夕月用素冕地祇用黃冕  
神州社稷用玄冕享先王加元服笄象冕享先帝食三  
老耕籍等以袞冕視朝大射等以山冕視朝臨法門適  
宴等以鷩冕皆十有二旒 通典隋採北齊之法袞冕  
垂白珠十二旒組為纓色如其綬克耳玉笄裝正秦色

並用玄 隋書六等之冕皆有黼黻黃綿為之其大如  
橘自皇太子以下並犀道青纓 長編乾德元年閏十  
二月詔乘輿所服冠冕去珠玉之飾 合璧事類治平  
二年詔裁定袞冕制度天子之服有袞冕前後十有二  
旒二纓並貫珠璣又十有二碧鳳銜翠旒在珠旒外板  
以龍麟錦表上綴玉為七星旁施琥珀瓶犀瓶各二十  
四綴金絲綢鈿以珠璣雜寶玉如紫雲白鶴錦衣四柱  
飾以七寶袞服間以雲朵飾以金釵花鈿窠裝以珠璣

琥珀雜寶玉祭天地宗廟朝享太清玉清昭應靈宮等服之 合璧事類元豐四年臣僚言古者冕弁則用紃冠則用纓今衣服令乘輿服大裘冕以組為纓色如其綬衰冕朱絲組帶為纓冕而用纓不與禮合請改用朱組紃仍改平冕為玄冕用纓不赤而微黑者又別圖上韞制從之 見聞錄古冕十有二旒旒十二玉前後各用玉百四十四宋時冕中貴人呼為平天冠共用北珠一百四十五顆麻珠四千五百九十顆調珠八千六十



四顆則冕冠可謂至重 大明會典凡祭天地宗廟及  
正旦冬至聖節則服袞冕祭社稷先農冊拜亦如之洪  
武十六年定冕前方後圓玄表纁裏前後十二旒每旒  
五采玉十二珠五采繅十有二就就相去一寸紅絲組  
為纓黼纁克耳玉簪導二十六年定冕版廣一尺二寸  
長二尺四寸冠上有覆玄表朱裏前後各有十二旒旒  
五采玉珠十二玉簪導朱纁永樂三年定冕冠以阜紗  
為之上覆曰緹桐版為質衣之以綺玄表朱裏前圓後

方廣一尺二寸長二尺四寸前後各有十二旒每旒各五采纁有十二就貫五采玉珠十二赤白青黃黑相次以玉衡維冠玉簪貫紐紐與冠武并繁纓處皆飾以金縱左右垂黻纁克耳繫以玄紬承以白玉瑱朱紘嘉靖八年定冠制以圓匡烏紗冒之冠上有覆版長二尺四寸廣二尺二寸玄表朱裏前圓後方前後各有采玉珠十二旒以黃黑青白黑紅綠為之玉珩玉簪導朱纓青纁克耳綴以玉珠二凡尺皆以周尺為度 明諸司職

掌東宮冕九旒旒九玉簪導紅組纓兩玉瑱親王冕  
五采玉珠九旒旒紅組纓青纁克耳金簪導世子冕三采  
玉珠七旒紅組纓青纁克耳金簪導郡王冕同世子

弁

白虎通弁之為言攀持髮也 顏師古漢書注皮弁以  
鹿皮為冠形如人手之弁合也 輿服志皮弁與委貌  
同制長七寸高四寸製如覆杯前高廣後卑銳所謂夏  
之母追殷之章甫者也行大射禮辟雍公卿諸侯大夫

行禮者冠委貌執事者冠皮弁 晉書皮弁以鹿皮淺  
毛黃白色者為之天子五采諸侯三采天子則縫十二  
侯伯七子男五孤四卿大夫三 羣書考索周禮司服  
云視朝則皮弁服弁師云王之皮弁會五采玉璫士冠  
禮云皮弁服素積聘禮云賓皮弁聘詩云會弁如星玉  
藻云天子皮弁以日視朝郊特牲云王皮弁以聽祭報  
蓋皮弁天子以視朝以宴以聽郊報諸侯以聽朔以巡  
牲卿大夫以聘士以冠學士以釋菜凡士大夫之朔月

皆皮弁服則皮弁之所施者衆矣 尚書顧命四人綦

弁執戈上刃夾兩階記注綦文鹿子皮弁 鄭玄周禮

註會縫中也璣讀如綦結也皮弁之縫中每結五采玉

十二以為飾謂之綦 彙苑詳註魏晉以來皮弁有纓

無筭導何稠曰此古之田服也既以入朝宜變其制故

弁施象牙簪 事物紺珠國朝皮弁為紗冒之前後各

十二縫每縫各綴五采玉十二為飾玉簪導紅組纓朔

望視朝降詔降香進表四夷朝貢覲服東宮皮弁九縫

綴九玉金簪朱纓 三禮圖爵弁士助君祭之服以祭其廟無旒韋弁王及諸侯兵服也 董巴輿服志爵弁一名冕廣八寸長尺二寸如爵形前小後大其上似爵頭色有收持筭所謂夏收殷皞者也祠天地五郊明堂雲翹舞樂人服之 獨斷爵弁以三十升漆布為殼周黑而赤如爵頭之色前小後大殷黑而微白前大後小夏純黑而赤前小後大皆有收以持筭 周書二人雀弁執惠立於畢門之內注雀弁韋弁也 白虎通以韎

韋為之謂之韋弁 晉書韋弁制似皮弁頂上尖韎草  
染之色如淺絳 漢書王莽初獻大樂於明堂太廟羣  
臣冠麟韋之弁 羣書考索司服凡兵事韋弁服弁師  
諸侯及孤卿大夫之冕韋弁或曰周禮有韋弁無爵弁  
書與冠禮禮記有爵弁無韋弁士之服止於爵弁而荀  
卿曰士韋弁則爵弁即韋弁也 漢輿服志武冠一曰  
武弁 唐車服志武弁者武官朝參殿廷武舞郎堂下  
鼓人鼓吹按工之服也 左傳楚子玉自為瓊弁玉纓

鄴中記石季龍宮婢數十盡著皂褙頭著神弁如今  
禮先冠也

格致鏡原卷十三



欽定四庫全書

格致鏡原卷十四

大學士陳元龍撰

冠服類二

巾

輟耕錄釋名巾謹也當自謹於四教按儀禮二十成人  
士冠庶人巾則古者士以上有冠無巾幘惟庶人戴之  
秦謂民為黔首漢謂僕隸為蒼頭漢書謂卑賤者所服  
此其證也後世上下通用之謂之燕巾蔡邕獨斷曰漢

元帝額有壯髮不欲人見故加巾幘以包之古者冠制皆硬殼自額上至於頂如今禮冠者然後世乃作小冠厘以束髮冠下施幘冠幘之上又總施巾皆效漢元帝所服之制也 學齋佔俾古者有冠而無巾非無巾也蓋中止以冪尊罍瓜果之用不加於首也故六經止言冠下至於虞人亦以皮冠野老亦以黃冠是有簪導方為冠也至於罪人方去其冠而加黑幪漢世之冠以簪附之而所謂巾幘稍稍施於執事賤人之首如庖人綠

幘是也至晉人輕浮方有接羅白葛漉酒之巾然起於  
後漢郭林宗之折角巾矣至近代反以巾為禮而戴冠  
不巾者為非禮 諸事音考頭巾古所未有漢王莽頭  
禿始施巾或以阜羅裹髮因有此製與今式不同自後  
宋製漸繁始有圓象天方象地者 晉書漢末王公名  
士多委王服以幅巾為雅是以袁紹崔鈞之徒雖為將  
帥皆著縑巾 中華古今注隋大業十年禮官上疏裹  
頭者宜裹巾子以桐木為之内外皆漆在外及庶人常

服沿至證明二年則天賜羣臣絲葛巾子呼為武家高巾子亦曰武氏內樣 隋唐嘉話舊人皆服袞巾至周武始為四脚國初又加巾子焉 唐書武后擅政多賜羣臣巾子勒以回文之銘皆無法度不足紀至中宗又賜百官踣樣巾帝在藩時冠也其後文官以紫黑絁為巾賜供奉官及諸司長官則有羅巾圓頂巾子後遂不改 朝野僉載唐魏王為巾子向前踣天下欣忻慕之名為魏王踣後坐死至孝和時陸頌亦為巾子同此樣

時人又名為陸頌跽未一年而陸頌殞 秦再思記異  
昭宗播遷於鳳翔時侯王將帥在岐下者軍人咸以珠  
飾巾競相誇尚 清異錄同光即位身預俳優尚方進  
御巾裏名品日新今伶人所頂尚有合其遺製者曰聖  
逍遙安樂巾珠龍便巾清涼寶山交龍太守六合舍人  
二儀幘頭烏程樣玲瓏高常侍小朝天玄虛令漆相公  
自在冠鳳三十日華輕利巾九葉雲黑三郎慶雲仙聖  
天宜卿凡二十品 清異錄桑維翰服蟬翼紗大夫帽

庶表四方名為化巾 孔六帖前蜀王衍好裹尖巾其狀如錐 米芾畫史士子國初皆頂鹿皮冠弁遺制也更無頭巾其後方見用紫羅為無頂頭巾謂之額子其後舉人始以紫紗羅為長頂頭巾垂至背以別庶人黔首今則士人皆戴庶人花頂頭巾稍作幅巾逍遙巾

周煒北轅錄金國人所頂之巾謂之蹋鵝 陶宗儀元氏掖庭記后妃侍從有定制妃二百人冠懸梁七曜巾嬪八十人冠文縠巾又有春陽一線巾乃方士所進云

是東海長生公所服 沈文初政記 洪武三年二月命  
製四方平定巾式頒行天下以士民所服四帶巾未盡  
善復制此令士人吏民服之 七修類藁 今里老所戴  
黑漆方巾乃楊維禎入見太祖時所戴上問曰此巾何  
名曰四方平定巾也遂頒式 王達椒宮舊事后見秀  
才巾服與胥吏同乃更製儒巾藍衫令上著之上曰此  
真儒服也遂頒天下 事物紺珠 儒中國朝倣幘頭制  
設垂帶生儒服 郭林宗外傳 林宗常行陳梁之間遇

雨故其中一角霑而折二國學士著巾莫不折其角云  
林宗巾其見儀則如此 畱青日札折角巾今有六角  
巾八角巾常服本四角此好異者 庶物異名疏冒絮  
巾名漢薄太后以冒絮提文帝晉灼曰巴蜀異物志以  
頭上巾為冒絮應劭謂陌額絮顏師古云冒覆也老人  
所以覆其頭也按漢書皇后親蠶絲絮織室作祭服皇  
后得以作絮巾管寧別傳寧著絮巾博物志蜀人以絮  
巾為帽絮晉說是也 晉書巾以葛為之形如帽而橫



著古之尊卑共服 宋書陶潛好酒郡將候潛逢其酒  
熟取頭上葛巾漉酒畢還復著之 南史劉訐常著穀  
皮巾破衲衣在林谷之間意氣彌遠遇者皆謂神仙  
南史梁武賜陶弘景以鹿皮巾 劉商鹿耳巾歌趙侯  
首帶鹿耳巾規模出自陶弘景 杜詩錦里先生烏角  
巾 豫章記王隣隱西山頂菱角巾又嘗就人買菱脫  
頂巾貯之嘗未遇而歎曰此巾名實相副矣 酉陽雜  
俎皇甫真以辟塵巾遺高瑀因出郊風埃大作瑀馬

左右並無纖塵 孔六帖裴冕自製巾子工甚人爭效  
之號僕射巾 浣花旅地志拂油巾蜀人奉親之服

畱青日札唐巾唐制四脚二繫腦後二繫領下服牢不  
脫有兩帶四帶之異今進士巾亦稱唐巾兩儀巾後垂  
飛葉二扇飛簷巾東坡巾云蘓子遺制山谷巾黃庭堅  
遺制萬字巾上闊而下狹形如萬字鑿子巾如唐巾而  
去其帶耳 玉燭寶典洛陽人家冬至戴一陽巾 竹  
樓記戴華陽巾 畱青日札雲巾一名燕尾巾蘓子瞻

有謝人惠雲巾詩 丹鉛錄綱巾說文綱青絲綬也音  
闕仲長統昌言身無半通青綱之綬而竊三辰龍章之  
服爾雅綱似綱組似組東海有之皆以草色似也綱鹿  
角菜組海中苔今之燕窠菜也詩人白綱巾紫綱巾皆  
合用此字而俗多用綸綱自綱綸自綸豈可混用也

畱青日札石季龍以女騎一千為鹵簿皆著紫綸巾織  
錦袴金銀縷帶五紋織成靴游於戲馬觀魏瓘搗衣賦  
黃金釵兮碧雲髮白綸巾兮青女月佳人聽兮良未歇

則是婦人亦冠白綸巾也 演繹露隋時以白帕通為  
慶弔之服國子生服白紗巾晉人著白接羅實平酒譜  
曰接羅巾也南齊垣崇祖守壽春著白紗帽肩輿上城  
今人必以為怪古未以白色為忌也 玉堂漫筆襄陽  
大隄曲有倒著接羅花下迷蓋用白紗作巾南朝雖帝  
王亦服白紗帽沈攸之所謂大事若克白紗帽共著耳  
又別有白疊巾白綸巾後世惟凶服乃用白 地理志  
湖州土貢折阜巾 後漢書靈帝時張角聚衆十六萬

皆著黃巾 七修類藁今樂人朝制以碧綠之中裏頭  
原唐史李封為延陵令吏人有罪不加杖罰但令裏碧  
綠巾以辱之隨所犯之重輕以定日數吳人遂以著此  
服為恥意今吳人罵人妻有淫行者曰綠頭巾及樂人  
以碧綠之中裏頭皆此意但又思當時李封何必欲用  
綠巾及見春秋時有貨妻女求食者謂之娼夫以綠巾  
裏頭以別貴賤然後知從來已遠李封亦因是以辱之  
耳 李白詩吳江女道士頭戴蓮花巾 陶宗儀元氏

掖庭記麗嬪張阿玄乃私製一崑崙巾上起三層中有  
樞轉玉質金枝紉綵為花團綴於四面又製為蜂蝶雜  
處其中行則三層磨運百花自搖蜂蝶欲飛皆作攢蕊  
之狀

幘

輿服志幘者幘也頭首嚴幘也 應劭漢官儀幘古者  
卑賤執事不冠者之所服也 演繹露幘者冠下覆髻  
之中也史游急就章曰冠幘簪黃結髮鈕顏師古釋之

曰幘者韜髮之巾所以整亂髮也當在冠下或單著之  
揚雄方言曰覆髻謂之幘巾或謂之承露或謂之覆髻  
皆趙魏間通語也夫其從覆髻而言則顏師古謂為整  
髮者是也冠冕有旒崔豹古今注以為垂露則承露云  
者從藉冠言之也漢元帝額有壯髮始進幘服庾凱醉  
墮幘機上以頭就穿取檀道濟被收脫幘投地皆顏師  
古謂或單著之者也若其人應著冠則以幘籍其下賤  
而執事則無冠單著幘也蓋始有幘時未以覆髻但韜

裏鬢毛使著冠使不蒙面耳凡此言冠而及幘者其冠皆冕冕冒額故必用幘以收髮也 與服志未冠童子幘無屋者示未成人也入學小童幘用句卷屋者示尚幼小未遠冒也 與服志古者有冠無幘秦以為武將首飾為絳帕以表貴賤後稍作顏題漢興續其顏却結之施巾連題却覆之至文帝乃高顏續為之耳且崇其屋貴賤皆服之 批言隋禮儀注曰幘始於秦然吳越春秋云公孫聖勸吳王遣下吏太宰嚭王孫駱解冠幘



肉袒徒跣稽首謝於句踐是則春秋時已有幘矣 獨  
斷元帝額有壯髮不欲使人見始進幘服之羣臣皆隨  
焉然尚無巾如今半幘而已王莽無髮乃施巾故語曰  
王莽秃幘施屋冠進賢者宜長耳冠惠文者宜短耳各  
隨所宜 輿服雜事漢桓帝延熹中梁冀誅後京師作  
幘皆顏短耳長短上長下以為服妖 劉楨答魏文帝  
牋貂蟬之尾挂侍臣之幘 五雜俎古人幘上加巾冠  
想因髮不齊之故今網巾是其遺意但幘以布絹為之

加屋其上可以代冠今俗名腦包者 演繹露後漢書

曰劉俠卿為劉盆子制半頭赤幘續漢書曰半頭幘即空頂幘其上無屋故以為名東宮故事曰太子有空頂幘一枚空頂即半頭也元帝時尚未有巾故東宮用空頂巾者本古也王莽禿幘施屋屋即巾也有顏有屋即異乎空頂矣梁冀改易服制作庫幘狹冠是冀自改莽制損下其屋也 南史王儉作解散幘朝野慕之爭相倣效 晉書漢時冠進賢者宜長耳今介幘也冠惠文

者宜短耳今平上幘也始時各隨所宜遂因冠為別介  
幘服文吏平上幘服武官也又有納言幘幘後收又一  
重廣三寸又立秋日獵服緋幘唐車服志平上幘者  
武官衛官公事之服也黑介幘者國官視品府佐謁府  
國子太學四門生俊士叅見之服也介幘者流外官行  
署三品以下登歌工人之服也綠幘者尚食局主膳典  
膳局典食大官署食官署供膳奉饌之服也漢書董  
偃綠幘傳謁拜謁武帝漢輿服志凡齋用紺幘耕用

青幘秋貙劉用緋幘 通典虎賁羽林郎將皆赤幘

摯虞決疑要註凡救日食皆著赤幘以助陽也 演繹

露東觀漢記載光武初起服赤幘賜段熲赤幘大冠一

具孫堅為董卓所圍著赤幘潰圍而出皆執事者單

幘之證也夫止雨救日執事者皆赤幘未必主為助陽

也蓋漢以火王其在五德尚赤耳故董仲舒繁露曰以

赤統者幘尚赤是專漢制也 孔六帖朱桃推益州成

都人長史竇軌遺以麕幘委之地不肯服 洛陽伽藍

記于闐國國王頭著金冠以雞幘頭垂二尺生絹廣五寸以為飾 綠雲亭雜言明太祖一日微行至神樂觀有道士於燈下結網巾問曰此何物也對曰網巾用以裹頭則萬髮俱齊明日有旨召道士命為道官取巾十三頂頒於天下使人無貴賤皆裹之也 新知錄予讀禮問喪篇親始死雞斯徒跣陳澔注曰雞斯讀為笄纓笄骨笄也纓韜髮之縉也親始死孝子先去冠惟畱笄纓也夫曰纓曰縉字皆從絲是知網巾盖托始於此也

道士特變其制而加飾耳

幘頭

附幘頭

幘頭

二儀實錄古以阜羅三尺裹頭號頭中黔首以阜絹裹髮亦為軍戎之服後周武帝裁為幘頭席上腐談幘頭起於周武帝以幅巾裹首故曰幘頭幘字音伏與幘被

之幘同今訛為僕魯公類說後周武帝裁為四脚名服頭身章舉要幘頭有圓頂方頂軟脚硬脚之不同宋郭思畫論後周以三尺阜絹向後幘髮名折上巾

通謂之幞頭隋朝惟貴臣服烏紗帽次用桐木黑漆為  
巾子裹於幞頭之內前繫二脚後垂二脚貴賤服之而  
烏帽漸廢則天朝以絲葛為幞頭巾子以賜官開元間  
始易以羅又別賜供奉官及內臣圓頭宮樣巾子至唐  
末方用漆紗裹之乃今幞頭也 唐史馬周議裹頭左  
右各三摺象三才重繫前脚法二儀詔從之 唐語林  
開元中燕公張說當朝冠服以儒者自處玄宗嫌其異  
已賜內樣巾子長脚羅幞頭 演繹露幞頭之制裁紗

覆首盡韜其髮兩脚繫腦後故唐裝悉垂脚其改為硬脚史不載所始莫知其的自何時也孫角談苑載柳玘在東川有從子來省玘不甚顧眎其家人為之叙說房派行第亦不領略僕隸輩相與獻疑曰得毋責敬於君之幞頭也乎姑垂脚入見以占其意可也此郎乃垂下翹翹之尾果獲撫接則知當柳玘時幞頭不皆垂脚其尾而下垂者乃其用以為敬也朱子語錄唐人幞頭初止以紗為之後以其軟遂斫木作一山子在前襯起



名曰軍容頭其說以為起於魚朝恩一時人爭效之士大夫欲為幘頭則曰為我所一軍容頭來及朝恩被誅人以為語讖 語錄唐人朝服猶著禮朋幘頭圓頂軟脚今之吏人所冠是也 秦再思洛中紀異昭宗乾符初教坊內教頭張口笑者以銀撚幘頭脚上簪花釵與內人裏之上說乃曰與朕依此樣進一枚來上親櫛之復覽鏡大說由是京師貴近效之 清異錄廣順初薄閱太廟雜物其間有珠絡平金朝天幘頭一事 清異

錄郢王鳳歷之叛別制幞頭都如唐巾但更雙腳為仙  
藤耳其徒號為順裏洛中紀異昭宗播遷於鳳翔侯  
王將帥在岐下者皆以珠一顆盤幞頭腳貫以銀線而  
簪之洎朱梁篡立乃知珠已居人上者久矣清異錄  
清泰燕服凡兩品幞頭李家寬者漆地加金線稜盤四  
脚差細朱子語錄或問長脚幞頭唐莊宗取伶官幞  
頭戴之後遂為例曰本唐明皇已戴長脚幞頭或云藩  
鎮僭禮為之遂為此樣本朝易以藤織者而以紗冒之

近時方易以漆紗嘗見南溪沙漠一士夫家尚收得上  
世所藏幞頭猶是藤織坏子唐制又有兩脚上下者亦  
莫可曉 夢溪筆談幞頭一謂之四脚乃四帶也二帶  
繫腦後垂之折帶反繫頭上令曲折附頂故亦謂之折  
上巾唐制唯人主得用硬脚晚唐方鎮擅命始僭用硬  
脚本朝幞頭有直脚局脚交脚朝天順風凡五等唯直  
脚貴賤通服之又庶人所戴頭巾唐人亦謂之四脚蓋  
兩脚繫腦後兩脚繫領下取其服牢不脫也無事則反

繫于頂上今人不復繫領下兩帶遂為虛設 席上腐  
談周武所製不過如今之結巾就垂兩角初無帶唐人  
添四帶以兩角垂前兩角垂後宋又橫兩角以鐵線張  
之庶免朝見之時偶語近時涼縗巾竹絲為骨如涼帽  
之狀而覆以阜紗易脫易戴夏月最便以此見幞頭之  
製亦是展轉番騰故其樣古今不同如此 演繹露宣  
和重修鹵簿圖言唐制皆垂脚其後帝服則脚上曲五  
代漢後漸變平直 後山談叢英宗崩宋次道誤為布

幘頭有司遂用民間布喪之服以金漆紗幘頭去其鐵  
脚而布裏之前繫後垂而不可加冠幘頭之失自次道  
始也余謂四脚加冠今士大夫喪冠是也大布之冠古  
也四脚今也於禮為繁矣 朱或可談衛士順天幘頭  
有一脚下垂者其儕呼為雕當入聲 劉放詩話李家幘  
頭天下稱善而必與人乖刺歲久自以拗李呼 學齋  
佔俾朝服幘頭乃後魏狄製及後唐而施長脚以同伶  
優之賤以至於今士夫安之魯莫議其非者 金志國

主視朝服纁紗幘頭 事物紺珠國朝幘頭用漆紗二  
等展角各長一尺二寸文武官公服同用雜職官用垂  
帶

附幘頭 逸雅綃頭綃鈔也鈔髮使上從也或曰陌頭  
言其從後橫陌而前也齊人謂之幘言幘歛髮使上從  
也 後漢書周黨著穀布綃頭待見尚書注以穀樹皮  
為綃頭 方言幘頭自關而西秦晉之郊曰絡頭南楚  
江湘間曰陌頭自河以北趙魏之間曰幘頭或謂之帑

或謂之幘其偏者謂之髻帶或謂之髻帶覆結謂之幘  
巾或謂之覆髻註自項中而前交額上卻繞髻髻帶今  
之偏疊幘頭髻音菜髻亦結也覆髻今結籠是也困  
學紀聞玉藻柱士以下皆禪不合而縹積如今作幘頭  
為之也後漢向栩著絳綃頭注綃當作幘古詩云少年  
見羅敷脫巾著幘頭

帕頭 二儀實錄禹會塗山之夕大風雷震有甲步卒  
千餘人其不被甲者紅綃帕抹其額自此遂為軍容之

服 周祈名義考秦本記更名民曰黔首祭義疏謂以  
黑布覆首謂之黔首戰國策魏蒼頭鮑彪註謂以青帕  
首項也 晉書太康中以氈為帕及絡帶袴口 廣博  
物志雲定興謂宇文述曰入內宿衛必當耳冷乃為製  
袂頭中令深昝耳時人學之名為許公昝勢許公述封  
爵也 席上腐談韓退之元和聖德詩云以紅帕首蓋  
以紅綃縛其頭即今之抹額也帕首幞頭本只是一物  
今分為二物



帽附帻

接羅

畢羅

通典上古衣毛冒皮則帽之名所由起故釋名曰帽者冒也 晉書帽猶冠也義取蒙覆其首其本纚也古者冠無幘冠下有纚以繒為之後世施幘於冠因或裁纚為帽自乘輿宴居下至庶人無爵者皆服之 漢書鄧通初為刺船郎著黃帽 西京雜記趙飛燕為皇后其女弟遺飛燕金輪紫華帽 魏略管寧在家恒著阜帽 晉書魏明帝著繡帽披縹紈半袖常以見直臣楊阜

諫曰此禮何法服邪 中華古今注搭耳帽本胡服以  
韋為之以羔皮絡縫趙武靈王更以綾絹皂色為之始  
並立其名爪牙帽子蓋軍戎之服也又隱太子常以花  
搭耳帽子以畋獵游宴後賜武臣及內侍從 庶物異  
名疏膩顏帽也世說林公文度著膩顏 隋志宋齊之  
間天子宴私著白高帽士庶以烏太子在上省則帽以  
烏紗在永福省則白紗 演繹露侯景僭立時著白紗  
帽而尚披青袍宋泰始元年羣臣欲立湘東王遂引入

西臺登御座著白紗帽按此即白紗帽乃人主之服故  
以此為定 宋書沈慶之患頭風好著狐皮帽羣蠻號  
曰蒼頭公 北史吐谷渾慕利延遣使通宋獻烏丸帽  
南史齊永明中百姓忽著破後帽自建業流於四遠  
貴賤翕然服之此服妖也 宛委餘編齊永明末年民  
間製倚勸帽建武中帽褰覆頂東昏侯斷之東昏時羣  
小又造四種帽因勢為名一曰山鵲歸林二曰兔子度  
坑三曰反縛黃離嘯四曰鳳凰度三橋皆服妖也 南

史東昏侯時百姓皆著下屋白紗帽而反裙覆頂東昏  
曰裙應在下今更在上禁之百姓反裙向下東昏又令  
左右作逐鹿帽形甚窄狹後果有逐鹿之事又與羣小  
別立帽簪其口而舒兩翅名鳳度三橋皆用金寶親自  
著之又作著調帽鑲以金玉間以孔翠梁武帝宅在三  
橋而鳳度之鳳翔之驗南史齊潘貴妃乘卧輿帝騎  
從著金薄帽有錦繡諸帽數十種南史齊王儉作斜  
插帽朝野慕之相與倣效南史徐龍駒常住含章殿

著黃綸帽 南史天監中高麗遣使齎綿帽供養誌公  
中華古今注大帽子本巖叟草野之服也至後魏文  
帝詔百官常以立冬日貴賤通戴謂之溫帽 廣博物  
志周獨孤信馳馬帽微側人遂為側帽 北史齊宗道  
暉好著高翅帽 北史高昂為司徒公好著小帽世因  
稱司徒帽 北史梁蕭譽惡見人髮白擔輿者夏月則  
加蓮葉帽 陶穀清異錄張崇帥廣在鎮不法從者數  
千人出遇雨雪皆頂蓮花帽所費油絹不知紀極市人

稱曰雨仙 郭思畫論閭立本圖昭君戴帷帽以據鞍  
殊不知帷帽創從隋代帷帽如今之席帽周回垂網  
事物原始唐車服志曰帷帽創於隋代永徽中拖裙及  
頸今世士人往往用阜紗全幅綴於油帽或氎笠之前  
以障風塵為遠行之服蓋本於此又有面衣前後全用  
紫羅為幅下垂雜以他色為四帶垂於背為女子遠行  
乘馬之用亦曰面帽 中華古今注席帽本古之圍帽  
也男女通服之以韋為之四周垂絲網之施以珠翠丈

夫去飾煬帝淫侈欲見女子之容詔去帽戴幘頭巾子  
幘也以阜羅為之丈夫藤席為之骨輓以繒乃名席帽  
至馬周以席帽油御雨從事 唐實錄唐初以穀為帽  
以隔塵也北齊制唯天子紗帽臣下戎帽時王歸彥平  
秦特賜以紗帽 中華古今注武德九年十一月太宗  
詔曰自今以後天子服烏紗帽百官士庶皆同服之  
朝野僉載唐趙公長孫無忌以烏羊毛為渾脫氈帽天  
下慕之名其帽為趙公渾脫 開元遺事汝陽王璿戴

研光帽子打曲明皇自摘槿花置之帽上帽極滑久而  
放安號曰花奴帽 湘煙錄西王母宴羣仙有舞者帶  
研光帽帽上簪花舞山香一曲曲未終花皆落去 粧  
樓記何充以蜻蜓帽贖翡翠指環 李濟翁資暇錄永  
貞之前組藤為蓋曰席帽取其輕也後或以太薄冬則  
不禦霜寒夏則不障暑氣乃細色罽代藤曰氈帽貴其  
厚也非崇貴莫戴而人亦未尚元和十年六月裴晉公  
之為臺丞自化理第早朝時青鎮一帥拒命俾捷步張



宴等傳刀伺便謀害至里東門導炬之下霜刃歛飛時  
晉公繫帽是賴刀不即及而帽折其簷既脫禍朝貴乃  
尚之布素之士亦皆戴焉太和末又染繒而復代麕曰  
疊綃帽雖示其妙與氈帽之庇懸矣會昌以來吳人街  
巧抑有結絲帽若網其巧之淫者織花鳥相廁焉近又  
染藤為紫復以輕相尚 瑣碎錄羅隱帽輕巧簡便省  
樸人竊倣學相傳為減樣方平帽 清異錄韓熙載在  
江南造輕紗帽匠者謂為韓君輕格 五代史蜀王衍

晚年俗競為小帽僅覆其頂俛首即墮謂之危腦帽衍  
以為不祥禁之而衍好戴大帽 清異錄南漢僭創小  
國乃作平頂帽自冠之由是風俗一變皆以安豐頂為  
尚 隣幾雜誌近歲都下裁翠紗帽直一千至於下俚  
恥戴京紗帽御帽例用京紗未嘗改易也 朱子語錄  
桶頂帽乃隱士之服 外書伊川常服高帽桶八寸簷  
半寸置繫條曰此野人之服也 談記士大夫近年效  
東坡桶高簷短名帽曰子瞻樣 石林燕語余見大父

家居及燕見賓客率多頂帽而繫勒帛帽下帶小冠簪以帛作橫幅約髮號額子處室中則去帽見冠簪或用頭巾也 事物紺珠圓帽元世祖出獵惡日射目以樹葉置胡帽前其後雍古刺氏乃以氈片置前後今大簷帽 元氏掖庭記后妃侍從冠步光泥金帽 留青日札輿服志曰官民皆戴帽其簷或圓或前圓後方或樓子蓋兜鍪之遺制也所云樓子即今南方村中小兒所戴五采帽金線帽皆元俗也 事物紺珠國朝堂帽象

唐中制用硬盃鐵線為硬展脚列職朝堂之上乃敢用俗直曰紗帽 七修類藁今之紗帽謂之堂帽對私小而言非唐帽也唐則稱巾耳 事物紺珠中官帽洪武十九年創制休儀三山帽用紗裏之增方帶二條於後無官者頂後垂方紗一幅曰內使帽初高麗未服高廟知其王之冠乃制之命諸內侍冠之因謂其使者曰如汝者皆供使令汝主乃欲崛強耶使者歸言遂降事物紺珠小帽六瓣金縫上員平下綴檐國朝倣元制民

服瓦楞帽結牛馬尾作實錄羌人首服以羊毛為之  
謂之氍帽即今氍笠秦漢競服之巖棲幽事桐帽本  
蜀人作以桐木作而漆之畱青日札鎖鎖帽回紇用  
鎖鎖木根制之為帽火燒不滅亦不作灰燕閒錄樂  
府中有蘇幕遮乃高昌婦人所戴油帽高昌西域國西  
州也魏略夫餘國以金銀飾帽南史鄧至國呼帽  
曰突何原始秘書唐武后幸馮小保使為僧改名懷  
義封梁國公故衣帽皆用朝扮冠有五福曰毗盧或施

以八寶或嵌以金玉餘僧皆如之 元李材解醒語國  
初起圓殿於西宮中以居西僧僧官皆著茜帽 事物  
紺珠毘羅帽寶公帽僧伽帽山子帽班吒帽瓢帽六和  
巾頂包八者皆釋冠也

恰 韻書弁缺四隅謂之恰一曰按頭使下故曰恰  
俾蒼恰帽也 晉五行志魏武以天下凶荒資財乏匱  
始擬古皮弁裁縑帛為白恰又初魏造白恰橫縫其前  
以別後名之曰顏恰傳行之至永嘉間稍去其縫名無

顏恰 晉輿服志成帝咸和九年制聽尚書八座丞郎  
門下三省侍郎乘車白帟低帷出入掖門又二宮直官  
著烏紗帟往往士人燕居皆著帟矣

接羅 韻府白鷺蓑江東人取白鷺頭上翰秀為接羅  
帽戴因名白鷺蓑 爾雅注鷺頭翅背上皆有長翰毛  
今江東人取以為睫襪名之曰白鷺縑 酉陽雜俎武  
寧蠻好著芒心接羅名曰苧綏 庶物異名疏接羅乃  
山簡游習池醉而倒著歸者一名白鷺縑縑一作蓑魏

有白帟之制猶白接羅白綸巾白帽也

罽羅 孔氏雜說齊隋婦人施罽羅全身障蔽也唐永徽以後皆用帷帽拖裙到頸漸為淺露若今之蓋頭矣北史秦王俊有巧思每親運斤斧工巧之器飾以珠玉為妃作七寶罽羅重不可載以馬負之而行 中華古今注罽羅者唐武德貞觀年中宮人騎馬多著罽羅至神龍末罽羅殆絕其罽羅之象類今之方巾全身障蔽繒帛為之若便於事非乘車輦及坐檐子即此制誠



非便於時也開元初宮人馬上著胡帽靚粧露面士庶咸效之至天寶年中士人之妻著丈夫靴衫鞭帽內外一體也

### 笠

事林廣記笠子古者雖出於外國今世俗皆頂之或以牛尾馬尾為之或棕或阜羅阜紗之類為之事物紺珠笠織竹為禦雨具毛詩臺笠緇撮注臺夫須也

貴州圖經郡有葵可以為笠謂之葵笠屠隆游具箋

有細藤作笠方廣二尺四寸以阜絹蒙之綴簷以遮風  
日名雲笠有竹絲為之上以槲葉細密鋪蓋名葉笠有  
竹絲為之上綴鶴羽名羽笠三者最輕便甚有道氣  
卓氏藻林簷笠備雨器也國語簷笠相望於安陵 符  
子有澤火者冠霞笠兼莎裳褐衣緩步而去 世說謝  
靈運好戴曲柄笠 庶物異名疏管子曰農夫首戴茅  
蒲茅蒲蒲笠也 老子傳得時則駕不得其時則蓬累  
而行注積累蓬翥若今之笠然首戴之而行 名義考

程曉伏日詩今世襌襪子觸熱到人家諸韻書訓襌襪  
為不曉事二字從衣何以云不曉事蓋襌襪涼笠也以  
竹為之蒙以帛若絲織簷戴之以遮日炎暑戴笠見人  
必不曉事者也 墨莊漫錄白題乃胡人為氍笠也子  
美所謂胡舞白題斜 庶物異名疏雲南風俗首戴次  
工製如漁笠覆以黑氈親故雖久別無拜跪惟取次工  
以為禮 本草破笠名為敗天公燒灰酒服治鬼症  
詞林海錯黃蘗逢異僧至天台江漲不能渡異僧以笠

浮去

格致鏡原卷十四

欽定四庫全書

格致鏡原卷十五

大學士陳元龍撰

冠服類三

衣

總論 左傳衣身之章也 白虎通衣者隱也所以隱  
形也 逸雅凡服上曰衣衣依也人所依以庇寒暑也  
領頸也以壅頸也亦言總領衣體為端首也襟禁也交  
於前所以禁禦風寒也袂掣也掣開也開張之以受臂

屈伸也袖由也手所由出入也亦言受也以受手也衿亦禁也禁不得解散也爾雅注衣褊謂之視衣纓也齊人謂之擘或曰袷衣之飾黼領謂之褊繡刺黼文以褊領緣謂之純衣緣飾也袂謂之裳衣開孔也衣皆謂之襟交領也袂謂之裾衣後裾也衿謂之衽衣小帶佩衿謂之褱佩玉之帶上屬韜軒絕代語秦晉間謂無緣之衣曰褊裾江湘之間謂複襦曰䄡襖卓氏藻林纓繳衣領也文選纓繳流芳庶物異名疏繫格謂之

褊

音嘔見方言

郭璞云即小兒次衣也 事物紺珠摺衽折

至衣紋

音棘

衣領衽

音恐

衣襟

音曳

衣邊緣

音院

純邊帋絺

衣兜 肯綮錄小兒衣曰綳締 方言布而無緣敝而

袂之謂之襜褕 集韻襜褕衣破也裋褐亦衣敝也

書叙指南錦繡文采衣曰靡曼之衣

見墨子

婦人麗服曰

被文縠之華袿

見七啟

著破衣曰穿空

見鮑宣傳

葛衣曰織締

見潘岳賦

僕射服曰阜檐

見鮑永傳

尚書令所服曰絳服

見齊職儀

漢書兩粵傳上褚五十衣中褚三十衣下褚二十衣遺

王師古注以綿裝衣曰褚上中下者綿之多少厚薄之差也 漢書叔孫通傳衣一襲師古注一襲上下皆具也今人呼為一副也 揚雄方言梁益之間裂帛為衣曰撝 宋卜子楊園苑疏太液池西有武帝曝衣閣常至七月七日宮女出后衣登樓曝衣 酉陽雜俎衣服鬼名甚遼

歷代衣制 禮運昔先王未有麻絲衣其羽皮鄭注此上古之時也 物原有巢氏始衣皮軒轅妃嫫祖始育



蠶緝麻以興機軸而成布帛唐堯加以絺苧木綿草布  
毛罽虞舜加以錦繡秦始皇作夾襪墨子古之人未  
知有衣服之制故聖人作之冬則絹帛輕且暖夏則絺  
綌清且涼所以適身體如肌膚也董巴輿服志後世  
聖人觀翬翟之文榮華之色乃染帛以效之始作五采  
成以為服帝王世紀黃帝始去皮服為上衣以象天  
為下裳以象地家語黃帝與炎帝戰克之始垂衣裳  
作黼黻物原軒轅始定服色凡人君所尚服色各依

五運更之色 呂氏春秋胡曹作衣 淮南子伯余作

衣 韓子堯之有天下也冬日鹿裘夏日葛衣 虞書

帝曰予欲觀古人之象日月星辰山龍華蟲作繪宗彞

藻火粉米黼黻絺繡以五采彰施於五色作服 物原

周公始制天子服四時各以其色 月令季夏命婦官

染彩黼黻文章必以法故無或差忒黑黃蒼赤莫不質

良以給郊廟祭祀之服以為旗章以別貴賤等級之度

漢雜事高祖時令羣臣議天子所服衣服以安天下

謁者趙亮舉春季舜舉夏倪湯舉秋貢禹舉冬五時衣  
始於此 晉書魏明帝以公卿袞衣黼黻之飾擬於至  
尊多所減損天子服刺繡文公卿服織成文及晉受命  
遵而不改 晉書孫休後衣服之制上長下短又積領  
五六而裳居一二千寶以上饒奢下儉逼上有餘下不  
足之妖至皓卒以上奢下困亡國晉武泰始初衣服上  
儉下豐著衣者皆厭襖此君衰弱臣放縱下掩上之象  
物原隋文帝始制天子服專尚黃 玄覽煬帝定品

官服色三紫五朱六以下綠吏青庶人白商阜 宋燕  
翼貽謀錄舊制品官服緋紫皆以品格故選人久次多  
服緋紫京朝遷轉之速者反多服綠太平興國六年十  
一月冬至郊祀赦文令常參官衣緋綠 燕翼貽謀錄  
祥符八年三月庚子詔自中宮以下衣服並不得以金  
為飾應銷金貼金縷金間金戴金圈金剔金撚金解金  
陷金明金泥金榜金背金影金闌金盤金織金金線皆  
不許造 羣書考索宋制婦人服從夫子五等以上親

及五品以上母妻服紫衣腰襷標緣用錦繡九品以上  
母妻服朱衣流外及庶人不服綾羅縠五色線鞞履凡  
襴色衣不過十二破渾色衣不過六破 王曾筆錄每  
歲誕節端午初冬各賜時服有差內公服舊制雖冬賜  
亦止單製太祖以方冬不宜賜單衣特命改制今公卿  
大夫有袂公服自此始 七修類藁洪武二十三年三  
月上見朝臣衣服多取便易日至短窄有乖古制命禮  
部尚書李源名等參酌時宜俾有古義議凡官員衣服

文官自領至裔去地一寸袖長過手復回至肘袖襖廣復回不及肘三寸庶民衣長去地五寸武職官去地五寸袖長過手七寸袖襖廣一尺袖僅出拳軍人去地七寸袖長手五寸袖襖七寸袖口僅出拳頒示中外

法服 蔡沈尚書註日月星辰山龍華蟲六者繪之於衣宗彝藻火粉米黼黻六者繡之於裳所謂十二章也又按周禮冕服九章登龍於山登火於宗彝以龍山華蟲火宗彝五者繪於衣以藻米黼黻四者繡於裳蓋增

損有虞之制而為之耳華蟲雉也宗彝虎也藻水草也粉米白米也黼如斧形黻兩已相背也朱子詩傳

天子袞衣其龍一升一降上公袞衣惟一降龍其首卷然故謂之袞也陳留風俗記襄邑縣睢渙之間出文

章故有黻藻絺繡日月華蟲以奉天子周禮內司服

掌王后之六服褱衣

褱與鞶同伊雉而南素質五色皆備成章曰鞶揄狄與

江淮而南青質五色皆備成章曰揄闕狄

闕狄刻而不畫此三者皆祭服鞠衣

告桑之服也展

衣

以禮見王及賓客之服也

緣衣

御於王之服亦以宴居緣音祿

素沙

今之白絹也六服皆以素

沙為裏 辨外內命婦之服 鞠衣展衣緣衣素沙

內命婦九嬪服鞠衣

世婦服展衣女御服緣衣外命婦孤之妻服鞠衣卿大夫之妻服展衣士之妻服緣衣皆以素沙為裏

三禮圖 褱衣 褱雉名也其色玄後鄭以為素質五彩刻繒為褱雉之形五色畫之綴於衣上后從王祭先王則服之上公二王後夫人助君祭宗廟皆服之揄狄讀為揄翟雉名青質五采故刻繒為揄狄之形而五采畫之綴於衣上以為文章然則揄狄之衣其色青后從王祭先公則服之侯伯夫人助君祭宗廟亦服之闕翟其衣



色赤但刻赤色之繒為雉形間以文綴於衣上首飾如  
之其子男夫人從君祭宗廟亦皆服之 禮玉藻王后  
褱衣夫人揄狄君命屈狄 三禮圖鞠衣色黃告桑之  
服色如鞠塵象桑葉始生展衣色白後鄭云展當為褱  
褱之言亶也亶誠也此卿大夫之妻從夫助君祭宗廟  
則服之緣衣色黑后接御見王之時則服之 丹鉛錄  
後周皇后服制受繭則服鶯衣聽女教則服鶯衣音歸  
寧則服翊衣音秩鶯翊字惟見此蓋蕪綽所制也 羣書

考索皇后之服唐制三等一曰褱衣朝會服之二曰鞠  
衣親蠶服之三曰禮衣宴見服之國朝存其名常服龍  
鳳珠翠冠霞帔紺珠明朝制皇后翟衣玄色或紵絲  
線羅紗繡翟雉於上蔽膝物如衣繡素色羅中單紗衣  
則用紗白玉革帶織金大帶一條玄紵絲副帶一條錦  
綬一副玉環三白玉鈎碾鳳文珮一副妃翟衣青色或  
紵絲線羅紗繡翟雉於上蔽膝物如衣繡玉色線羅中  
單紗衣則用紗一件紅緣襖青紅線羅銷金大帶一條

紵絲副帶一條五色錦綬一副玉環二青紅綵結全白  
玉鈎碾鳳文珮一副白玉革帶身章撮要深衣古者  
聖人之法服也攷之於經自有虞氏始焉其製用十五  
升布鍛濯灰治而後為之上衣而下裳蓋有制度存焉  
記王制有虞氏皇而祭深衣而養老疏謂白布衣以  
質用白布也記玉藻深衣三祛縫齊倍要袷當旁袂  
可以回肘長中繼掩尺袷二寸祛尺二寸緣廣寸半  
禮記古者深衣短無見膚長無被土續袷鉤邊要縫半

下袼之高下可以運肘袂之長短反詘之及肘制十有二幅以應十有二月袂圓以應規曲袷如矩以應方負繩及踝以應直下齊如權衡以應平 輿服志後漢乘輿服深衣制有袍隨五時色 白雲許氏曰端衣古者布幅二尺有二寸此衣身長二尺二寸袂亦二尺二寸而屬幅謂袖接一幅也整齊端正故謂之端玄則其色也 禮書玄端齋服也諸侯與士以為祭服玉藻玄端以祭特牲冠玄端是也大夫士以為私朝之服玉藻朝

玄端是也天子至士亦以為燕服玉藻天子卒食玄端而居內則事父母端鉤是也然則端衣所用固不一矣酉陽雜俎明衣起於左伯桃禮書明衣之袂屬幅而不削明衣之裳前三後四而不辟積衣之長也下膝與要廣者異矣裳之長也及足跗與無見膚者異矣事物類考三代以來襲有明衣唐改用生絹單衣今但新衣而已

諸衣名類 禮玉藻纁為繭緇為袍禪為絺帛為褶注

續新綿也縕舊絮也衣之有著者用新綿則謂之繭用舊絮則謂之袍有表而無裏者謂之衲有表裏而無著者謂之褶 逸雅中衣言在小衣之外大衣之中也

徐野民車服注天子好禮釋奠中衣以緯縫緣其領袖其朝服阜緣 庶物異名疏詩豈曰無衣與子同澤注云澤裏衣以其親膚近於垢澤故謂之澤箋云褻衣近汙垢疏云衣服之暖於身猶甘雨之潤於物故言與子同澤正謂同袍裳是共潤澤也箋以上袍下裳則此亦

衣名故易傳為釋說文云釋袴也是褻衣近汙垢也釋  
是袍類故論語注褻衣袍釋也 左傳衷其袒服以戲  
於朝注袒服近身衣 逸雅汗衣近身受汗垢之衣也  
詩謂之澤受汗澤也或曰鄙袒或曰羞袒作之用六尺  
裁足覆胸背言羞鄙於袒而衣此耳 儀禮婦乘以几  
姆加景乃驅御者代註景之制如明衣加之以為行道  
御塵令衣鮮明也 庶物異名疏偏褻戎衣名晉獻公  
使太子申生衣之偏褻文選褻偏褻以讀列皮日休詩

索漠拋偏袈 禮記儒行傳孔子曰丘少居魯衣逢掖  
之衣注逢大也逢掖大袂禪衣也 莊子吾王所見劍  
士皆短後之衣瞋目而語難王乃悅之注短後不襜也  
高士傳老萊子孝奉二親行年七十作嬰兒戲身著  
五色斑斕之衣欲親喜焉 漢雋不疑傳男子衣黃襜  
褕師古注襜褕直裾禪衣 江克傳曲裾後垂交輸註  
曲裾者如婦人衣也如淳曰割正幅使一頭狹若燕尾  
垂之兩旁見後是禮深衣續衽鉤邊賈逵謂之衣圭蘇



林曰交輸如今新婦袍上挂全幅縐角割名曰交輸裁也 漢書匈奴傳服繡袷綺衣長襦錦袍各一師古注袷者衣無絮也繡袷綺衣以繡為表綺為裏也 馬縐中華古今注廚人襪衣廝徒之服也取其便於用耳乘輿進食者有服襪衣前漢董偃綠幘青襪加襪衣以見武帝廚人之服也 漢書朱博子元為瑯琊守勅功曹官屬多褻衣大袷不中節自今掾吏衣皆去地三寸 漢書王莽以唐尊為太傅尊以國歎民貧乃著短衣小

裋 後漢書朱勃字叔陽年十二衣方領能矩步注顯  
下施衿領正方學者之服也 逸士傳董威在洛陽隱  
居白社以殘絮縷帛為衣號百結衣 郭思畫論晉處  
士馮翼衣中大袖周緣以阜下加襴前繫二長帶隋唐  
朝野服之謂之馮翼之衣今呼為直掇 摛神記永嘉  
中士大夫競服生箋單衣識者怪之曰此古練線之布  
諸侯所以服天子也今無故服之殆有應乎其後懷愍  
晏駕 南史齊後主受刀勅等教著五音兒衣登城望

戰 北史天元詔天臺侍衛皆著五色及紅紫綠衣以  
雜色綠名曰品色衣有大事與公服間服之 毗言吳  
中方言稱衣之廣袖者曰海青按太白詩云翩翩舞廣  
袖似鳥海東來蓋東海有俊鷗名海東青白言翩翩廣  
袖之舞如海東青也 事物紺珠海青截褶宋太祖效  
南番制 大唐新語漁服總曰校衫 南史扶南國內  
男子著橫幅橫幅今汗漫也大家乃截錦為之貧者乃  
用布 夷事略大琉球之衣以鬪鏤南詔之衣以波羅

撥拔力之衣以羊皮阿里驕之民鹿皮貫木葉而衣之  
范子計然古者庶人老耄而後衣絲其餘則麻枲而  
已故曰布衣 左傳季札與子產縞帶子產獻紵衣焉  
左傳楚子次於乾溪雨雪王皮冠秦復陶翠被豹舄  
執鞭以出注秦復陶秦遺羽衣也 拾遺記宋景公懸  
四時之衣春夏以珠玉為飾秋冬以翡翠為溫 霍光  
傳珠璣玉衣師古注漢儀注以玉為襦如鎧狀 拾遺  
記晉太始初頻斯國人來朝以五色玉為衣如今之鎧

楚辭魚鱗衣而白蜺裳注魚鱗衣雜五采為衣如鱗  
文也 山堂肆考薜荔衣即女蘿衣隱者之服也 拾  
遺記員嶠山南有池移國人長三尺壽萬歲茅為衣衣  
服皆長裾大袖因風以升煙霞若鳥用羽毛 洞冥記  
支提國人結海苔為衣 拾遺記渠撻國人綴草毛為  
繩結綢為衣似今之羅紈也元狩六年來獻綢衣一襲  
帝焚於九達之道恐後人徵求以物奢費燒之煙如金  
石之氣 拾遺記董賢著霧綃單衣飄若蟬翼帝入宴

息之房命易輕衣小袖不用奢帶修裾使宛轉便易也  
宮人皆效其斷袖 應劭漢官儀虎賁中郎衣紗縠單  
衣 後漢本傳陸閔美姿貌喜著越布單衣世祖見而  
好之自後常勅會稽郡獻越布 董巴輿服志虎賁騎  
皆衣虎文單衣襄邑歲獻織成虎文 梁冀別傳冀作  
狐尾單衣上短下長 漢書王莽地皇三年正月九廟  
構成納神主莽謁者大駕乘六馬以五采毛為龍文衣  
東觀漢記明帝至長安有三老上章云見陛下甚喜

欲觀上衣因舉虎頭衣以畏三老 東齋記事唐張氲  
號洪崖先生常服紅蕉衣往來市間人莫知其歲 唐  
書杜亞傳亞拜淮南節度使方春南民為競渡戲亞欲  
輕駛乃髹船底使篙人衣油綵衣令溺水不濡焉 山  
堂肆考宋太祖委董遵誨以方面守通遠軍解所御真  
珠盤龍衣賜之 朱彧可談孟氏皇后時京師衣飾畫  
作雙蟬目為孟家蟬識者謂蟬有禪意久之后竟廢  
葉隆遼志五月五日午時採艾葉與綿相和絮衣七事

國主著之番漢臣僚各賜艾衣三事

雨衣

廣韻施

音移 扇音珍

雨衣也

庶物異名疏管子曰

農夫身穿襪襪襪襪蓑草結衣御雨之具也一曰麤堅

衣可任苦事物紺珠叢薜莎草雨衣演繹露王章

卧牛衣中注龍具也龍具之制不知何若按食貨志董

仲舒曰貧民常衣牛馬之衣食犬豕之食然則牛衣者

編草使暖以被牛體蓋蓑衣之類也

婦人衣

物原伊尹始制婦人大袖

逸雅婦人上服



曰袿其下垂者上廣下狹如刀圭也 漢書元后傳衣  
絳緣諸于師古注諸于大掖衣即袿衣之類 子虛賦  
蜚襪垂髻師古注襪袿衣之長帶也髻謂燕尾之屬皆  
衣上假飾非帶垂也 廣川王傳刺方領繡晉灼注今  
之婦人直領也 山堂肆考六朝文披輕袿曳華文輕  
袿華文皆舞女衣服也 採蘭雜志越雋國有吸華絲  
凡華著之不即墮用以織錦漢時國人奉貢武帝賜麗  
娟二兩命作舞衣春暮宴於花下舞時故以袖拂落花

滿衣都著舞態愈媚謂之百花舞衣 孔六帖敬宗寶  
歷二年閩東國貢舞女二人衣斬羅之衣無縫而成其  
文巧織人未之識焉 鳳池編李紳為相時俗尚輕綃  
紫蘸碧為婦人衣紳自為小君裁剪 杜陽雜編元載  
寵姬薛瑤英衣龍綃衣一襲重無一兩搏之不盈握瑤  
英體輕不勝重衣於異國求之 五代史前蜀王衍嘗  
與太后太妃游青城山宮人衣服皆畫雲霞飄然望之  
若仙 焦氏類林宋徽宗宮人衣裙多以麝香色為縷

金羅 宋書黃羅襪乳母服 晉書元康末婦人出兩

襠加乎交領之上此內出外也 升菴外集自漢魏六

朝至唐宮中衣皆尚窄非惟便於趨承亦以示儉為天

下先也觀馮緄墓石闕刻美人可見吳曹不興畫美人

衣僅束身畫家曹衣出水吳帶當風唐人垂帶多飄揚

而衣仍古制韓偓詩長長漢殿眉窄窄楚宮衣李賀詩

禿衫小袖調鸚鵡又越羅小袖新香菑可證也嘉靖中

四方婦人與男子無異直垂至膝下去地僅五寸袖潤

至四尺餘時有謔詩云碧羅舞袖雙垂地籠卻纏頭無處尋亦近服妖也

仙釋道衣 許老翁傳仙女天衣有金縷單絲錦縠銀

泥五暈羅裙 法苑珠林叨利天衣重六銖炎摩天衣

重三銖兜率陀天衣重二銖半化樂天衣重一銖他化

自在天衣重半銖 博異志天女衣六銖又曰五銖

漢武帝內傳西王母侍女服紺綾之袿 集仙傳太微

帝君遣三天左宮御史管修條賜大茅君盈八龍錦與

紫羽華衣 薩婆多論大衣分三品九條十一條十三條兩長一短名下品十五條十七條十九條三長一短名中品二十一條二十三條二十五條四長一短名上品 翻譯名義集南山云七條名巾價衣 戒壇經五條下衣斷貪身也七條中衣斷嗔口也大衣上衣斷癡心也 傳燈錄釋迦成佛號天人師住世四十九年將金縷僧迦梨衣傳法與摩訶迦葉 庶物異名疏涅槃僧裏衣一曰此方裙號僧伽梨大衣也楞嚴經如來于

師子座整涅槃僧歛僧伽梨取劫波羅天所奉華巾綰成一結示阿難又佛告比丘我此僧伽梨過去未來諸佛皆著此衣而得解脫說略梵言僧祇此云三衣者聖賢之幟幟也一曰僧伽梨即大衣也一曰鬱多羅僧即七條也一曰安陀會即五條也此是三衣若呼三條褊衫裙為三衣誤也演繇露僧衣環唐會要吐番官章飾有五等一瑟瑟二金三以金飾銀四銀五熟銅各以方圓三寸褐上裝之安膊前以辨貴賤今僧衣謂之

袈裟者當胸有環環中著鍵橫紐上下牙角銀銅隨力  
為之其源流殆出此乎 清異錄晉天福三年賜僧法  
城跋遮那謂袈裟環也王言云勅法城卿佛國棟梁僧  
壇領袖今遣內官賜卿研金虛縷沉水香紐列環一枚  
至可領取 說原袈裟一名無垢衣又名惡辱鎧又名  
覆膊又名掩衣謂覆左膊而掩右腋也 象教史編迦  
羅沙曳僧衣也省羅曳字止稱迦沙葛洪撰字苑添衣  
作袈裟 說略大淨法門經云袈裟者晉名去穢大集

經名離染服賢愚經名曰世服真諦雜記云袈裟是外國三衣之名名舍多義或曰離塵服由斷六塵故或名消瘦服由割煩惱故或名蓮華服服者離著故或名間色服以三如法色所成故言三色者律有三種壞色青黑木蘭青謂銅青黑謂雜泥木蘭即木皮也應法師云韻作髦髦音加沙葛洪字苑始改從衣丹鉛錄袈裟名水田衣又名稻畦帔王維詩乞飯從香積裁衣學水田王少伯詩手中花氎淨香帔稻畦成袈裟內典作髦



笠蓋西域以手為之又名逍遙服又名無塵衣要覽  
佛住王舍城經行見稻田畦畔語阿難云諸佛衣相如  
是從今依此作衣相記云田畦貯水生長嘉苗法衣之  
田潤以四利之水增其三善之苗以養法身自惠命也  
金陵雜志隋煬帝戒師聖種納袈裟一緣黃紋舍勒  
一腰鬱泥南絲布袈裟一緣鷄納袈裟一領絲布祇支  
二領譯云舍勒內衣也鬱泥謂鬱多羅泥也朝野僉  
載景雲中賀玄景自稱五戒賢者為金薄袈裟獨坐暗

室令愚者竊視云佛放光衆皆懾伏 事物紺珠禪僧

常服茶褐青綠五色袈裟講僧五色常服綠綠淺紅袈

裟教僧阜常服黑綠淺紅袈裟衆僧同 儆戒錄偽蜀

金臺縣三學士開照寺盜羣寇入寺劫掠緇徒罄盡寺

元有釋迦藕絲袈裟為千載之異物也賊曹分取與其

妻拆而易之夫妻當時手指節節墮落鬚鬢俱墜尋事

敗戮於市 說原褊衫謂褊袒左肩而拖其衣故製為

褊衫而全其兩肩也 說略褊衫梵言僧祇支西域記

云正名僧迦鷁此云覆腋衣用覆左肩右開左合竺道祖云魏時請僧於內自恣宮人見僧褊袒不以為善遂作此衣施僧因綴於左邊祇支上因而受稱即褊衫右邊今隱祇支名通號兩袖曰褊衫也 原始秘書唐武后幸僧懷義衣帽皆用朝扮衣用大袖如朝服制曰直掇曰褊衫曰寬衣加以錦繡 七修類藁曹溪寶林寺六祖遺服其一乃達磨所傳西域屈昉布緝綿花心織成者其一唐玄宗所賜織成淡山水者 智度論五比

丘曰佛當著何等衣佛言應著衲衣 辨疑志大歷中  
有一僧稱為苦行不衣繒絮布絕之類常衣紙衣時人  
呼為紙衣禪師 山堂肆考漢魏之世出家者多著赤  
布僧迦梨及秣陵諸僧衣色倣西竺皆著黑後周忌聞  
黑衣之讖悉屏去黑色著黃衣至唐武后始以紫袈裟  
賜僧法朗又元文宗寵愛僧欣笑隱賜以黃衣其徒後  
皆衣黃今制禪僧衣褐講僧衣紅瑜伽僧衣蔥白瑜伽  
今應赴僧也 山堂肆考唐中宗神龍初加道士葉靜

能金紫之階而未頒紫衣至代宗時李泌立大功李輔國將不利之泌乞為道士上賜以紫衣其後道士賜紫自泌始也事物紺珠道士常服青法衣朝服赤道官同道錄法衣朝服皆綠綬飾金

格致鏡原卷十五